



12. januar 2012

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

1. Pinerlussimasunut isertitsivinnut utaqqisut ikilisarniarlugit Inatsisinik atortitsinermut ministereqarfiup kalaallit pillakkat ilaasa isumakkeerfigineqarnissaannut siunnersuutaa Naalakkersuisut qanoq isumaqarfigaat?

2. Ulloq 1. marts 2011 Inatsisinik atortitsinermut ministereqarfiup pineqaatissinneqarsimasut isertitsivimmuq utaqqisut ikilisarnissaannut siunnersuut Namminersorlutik Oqartussanut tusarniutigaaq. Pinerlussimasunut isertitsivinnut utaqqisut ikilisarniarlugit Inatsisinik atortitsinermut ministerip siunnersuutaata Naalakkersuisunit Inatsisartunut sulii saqqummiunneqarsimannginnerannut suna pissutaava?

3. Pinerlussimasunut isertitsivinnut utaqqisut ikilisarniarlugit Naalakkersuisut nammineq qanoq iliuuseqarniarpat?

(Inatsisartunut ilaasortaq Andreas Uldum, Demokraatit)

Tunngavilersuut:

Aallaqqaammut oqaatigilara Demokraatit isumaqarmata pinerlussimasut isumakkeerfigineqanngisaannassasut pinerlussimasunut isertitsivinnut utaqqisut amerlavallaarnerat pissutiginnarlugu. Inatsisinik atortitsinermut ministerip taamatut siunnersuuteqarnera partiitut akerlerilluinnarparput.

Tikkuartariaqarparput, innuttaasut isertitsivimmiittussanngorlugit pinerlussimasut tassaammata sakkortuumik pinerluuteqarsimasut. Inuit taakkua isumakkeerfigineqarnissaat peqataaffiginaviannarparput. Kalaallit Nunaanni inuiaqatigiit inatsisinik tunngavillit pineqaatissiisimanerat naammassisariaqarpaat.

Taamatut oqareerluta, qularutigineqassanngilaq, ajornartorsiutaammata angisooq,



pinerlussimasunut isertitsivimmut taama amerlatigisut utaqqinerat. Tamanna tunngavigalugu pineqartoq oqallisigineqassappat ajunngilaq. Demokraatinili Naalakkersuisut ersarissumik oqariartuuteqarnissaat maqaasivarput. Aamma eqqumiigaarput Inatsisinik atortitsinermut ministerip siunnersuutaa marts 2011-mili Naalakkersuisunit tigummineqarsimammat – tassa qaammatini qulini – sunnguamilluunniit iliuuseqarfigineqarani.

Qularutissaanngilaq pinerlussimasut isertitsiviini naammattunik inissaqartitsinissaq Danmarkip akisussaaffigimmagu, imaanngilarli uagut maani ilorrisimaarjuussasugut utaqqillugu Danmarkimi arlaannik pisoqarnissaa. Tamanna tunngaviuvoq, uanga Naalakkersuisut ujartuiffingakkit, utaqqisut ikilisarniarlugit qanoq isummersornersut?

Demokraatini siusinnerusukkut eqqartornikuuarput pinerlussimasut niuikkut kalunniusamik ivertitsivigineqartalersinnaanissaat aamma tapersorsorparput inuiaqatigiinni kiffartuussititsinerusalernissaq.

Apeqqutit piffissap iluani ullut suliffiusut nalignnaat qulit iluanni akeqquneqarput.